

आकाशवाणी जयपुर—अजमेर प्रादेशिक समाचार ।

दिनांक 30.05.2024

समय: 18.45 बजे

- निर्वाचन आयोग राज्य मांय लोकसभा हलकावार मतगणना री तैयारियां री समीक्षा करी ।
- राजस्थान उच्च न्यायालय करडी गर्मी ऊं पैदा हालात माथे संज्ञान लेवता राज्य सरकार ने महताऊ निर्देश दिया ।
- प्रदेश मांय गर्मी रा तीखां तेवरां ऊं आज ई लोग बेहाल—एक जून ऊं लू ऊं राहत री आस ।
- झुन्झुनू जिला मांय गलत किडनी ऑपरेशन री पीड़ित महिला मरीज रो ईलाज जयपुर रा सवाई मानसिंह अस्पताल मांय कर्यो जायेला ।
- शिक्षा महकमो 5वीं अर 8वीं बोर्ड परीक्षा रा नतीजा ऐलाण कर्या—दौसा, सीकर, अजमेर, प्रतापगढ अर चूरू जिला रा स्कूल अब्बल रिया ।

000

निर्वाचन आयोग रा उप निर्वाचन आयुक्त मनोज कुमार साहू आज वीडियो कॉन्फ्रेंस रे मार्फत सगळ्ळां जिलां निर्वाचन अहलकारां रे साथे मीटिंग कर ने लोकसभा चुणाव री वोटां री गिणती सारू तैयारियां री समीक्षा करी । मुख्य निर्वाचन अहलकार प्रवीण गुप्ता बतायो के आयोग रा आला अहलकारां मीटिंग मांय लोकसभा चुणाव सारू मतगणना ऊं

जुड्या सगळां प्रोटोकॉल ने ध्यान मांय राखण माथे जोर दियो है। वणा राज्य रा सगळा 25 लोकसभा हलकां अर बागीदौरा विधानसभा हलका रा मतगणना ठौड़ माथे हिफाजती बन्दोवस्त अर मतगणना रा काम सारू जरूरी इन्तजामा माथे संतोष जतायो। श्री गुप्ता बतायो के वोटों री गिणती री प्रक्रिया अर मतगणना केंद्र रा बन्दोवस्त रा बारा मांय राजनैतिक दलां रा नुमाईन्दा रे साथे बैठक कर लीरीजी है। श्री गुप्ता बतायो के मतगणना ठौड़ माथे हिफाजत रा पुख्ता बन्दोवस्त करी ज्या है। करड़ी गर्मी ने देखता सगळा 29 मतगणना केन्द्रां माथे कूलिंग रा बाजिव बन्दोवस्त अर बिजली री बिना कटौती सप्लाई तैय करी जायेला। मतगणना केन्द्रां माथे मीडिया सेंटर मांय मीडियाकर्मियां सारू ई चाहिजता बन्दोवस्त कर्या जायेला। मुख्य निर्वाचन अहलकार बतायो के मतगणना ऊं पैला सगळा सीयू, वीवीपैट मशीनां अर इण ऊं जुड्या दस्तावेजा ने स्ट्रॉन्ग रूम ऊं ले र काउंटिंग हॉल ताई लावण अर मतगणना रे पछे पाछा स्ट्रॉन्ग रूम ताई ले जावण री कार्रवाही री लगातार सीसीटीवी कवरेज तैय करण जावे। ई बगत री सीसीटीवी कवरेज उम्मीदवार अर उण रा एजेंट मतगणना हॉल मांय टीवी / मॉनिटर माथे देख सकेला। मतगणना री प्रक्रिया री 3 सौ 60 डिग्री सीसीटीवी कैमरा अर वीडियोग्राफी कवरेज करी जाएला।

000

लोकसभा चुनाव रा सातवां अर आखिरी चरण रो चुनाव प्रचार आज पूरो व्हे गयो है। ई चरण मांय पैली जून ने सात राज्यां अर एक केंद्रशासित प्रदेश री 57 सीटां माथे वोट पड़ेला। वोटों री गिणती 4 जून ने व्हेला। ई चरण मांय उत्तर प्रदेश अर पंजाब री 13-13, पश्चिम बंगाल री नौ, बिहार री आठ, ओडिशा री छह, हिमाचल प्रदेश री चार, झारखण्ड री तीन अर चंडीगढ़ री एक सीट माथे वोट पड़ेला।

करड़ी गर्मी ने देखता चुणाव आयोग राज्यां ने मतदान केन्द्रां माथे वोट देवण वाळां सारू सगळां जरूरी इन्तजाम तैय करण रा निर्देश दिया है।

000

राजस्थान उच्च न्यायालय बधता तापमान ऊं पैदा व्ह्या हालात माथे खुद प्रसंज्ञान लेवता राज्य सरकार ने महत्त्व निर्देश दिया है। न्यायाधीश अनूप कुमार ढंड री पीठ प्रदेश मांय लू-तापघात ऊं बचाव री कार्य योजना बणा र उण ने समिति बणा र लागू करण ने कह्यो है। न्यायालय तापघात ऊं मरण वाळां लोगां ने वाजिब मुआवजो देवण अर ट्रेफिक सिगनळ अर चौराहां माथे छाया, पाणी रा चाईजता बन्दोवस्त करण रा निर्देश ई दिया है। इण रे अलावा हुकम मांय मजूरां ने 12 बज्या ऊं 3 बज्यां ताई काम ऊं आराम देवण रा बारा मांय दिशा निर्देश काढण, मौसम मेहकमां री चेतावनी रो प्रचार-प्रसार करण अर स्वास्थ केन्द्रां माथे ई सगळी जरूरी सुविधावां तैय करण ने कह्यो है।

0000

प्रदेश मांय गर्मी रा तेवर आज ई तीखां रह्या। सूरज री तपिश अर करड़ी लू ऊं जिन्दगी माथे असर पड्यो। तापमान मांय फेरू ई थोडी कमी आयी है। जयपुर रा खास बाजारां मांय इक्का दुक्का खरीददार ई पूग रह्या है। चूरू मांय आखे दिन शरीर झुलसावण वाळी लू चाली। उठिने भारत-पाक सरहद ऊं लागता जिला जैसलमेर मांय तीखी गर्मी ऊं लोग हाल बेहाल है। वठे ई गांवाई हलकां मांय करड़ी गर्मी रे कारण पाणी री कमी होवण लागी है। सड़कां अर बाजारां मांय सन्नाटो पसर्यो है। और ब्यौरा म्हारा खबरनवीस ऊं-

टोंक जिला मांय आज संवारां ऊं करड़ी गर्मी रो असर रह्यो वठे ई दोपहरां पछे ठण्डी हवां रे साथे छाटा-छिडको व्हयो। हल्की बिरखा ऊं सड़कां माथे पाणी बहवण लाग्यो जिण ऊं लोगां ने गर्मी ऊं थोड़ो राहत मिल्यो है। **भरतपुर** मांय ई आज मौसम रो मिजाज बदळ्यो, जठे संवारां गर्मी अर लू रा ठपेड़ां ऊं जिन्दगी माथे असर व्हे रह्यो

हो। वटे ई दोपहरां पछे बिरखा व्ही अर ठण्डी हवा चालण ऊं मौसम सुहावणो व्हे ग्यो अर तापमान ई कमी आयी जिण ऊं लोगां ने सुकुन अर जिनावरां अर पखेरूआं ने ई आराम मिल्यो है।

मौसम केन्द्र जयपुर मुजब आवता 48 घंटा मांय 2 ऊं 3 डिग्री सेल्सियस री और कमी आवण रा आसार है। वटे ई घणकरी ठौड़ां 1 जून ऊं हीटवेव मांय राहत मिलण री चौखी आस है। बीकानेर, जयपुर अर भरतपुर संभाग रा कुछ हलकां मांय आज हीटवेव अर कठे-कठे ई तेज हीटवेव चालण री आस है। आथूणी विक्षोभ रे सक्रिय होवण ऊं जयपुर, भरतपुर अर बीकानेर संभाग रा कुछ हलकां मांय काले ऊं 2 जून रे बीचे 40 ऊं 50 किलोमीटर री रपतार ऊं हवा चालण अर बिरखा रा आसार है।

000

झुंझुनूं मांय किडनी रो गलत ऑपरेशन होवण ऊं पीड़ित महिला रोगी ईद बानो रो ऊंचा थर माथे ईलाज अबे जयपुर रा सवाई मानसिंह अस्पताल मांय कर्यो लायेला। चिकित्सा अर स्वास्थ्य महकमां री अतिरिक्त मुख्य सचिव शुभ्रा सिंह रा निर्देश माथे महिला रोगी ने चौखो ईलाज मुहैया करावण सारू जयपुर लायी ज्या है। इण ऊं पैला मरीज रा ईलाज ऊं कतरावण अर रोगी ने गैर संवेदनशील तरीका ऊं डिस्चार्ज कर देवण माथे राज्य सरकार बीकानेर रा पी.बी.एम. अस्पताल रा मेडिसिन यूनिट रा हैड डॉ. बाल किशन गुप्ता अर नेफ्रोलॉजी विभाग रा आचार्य डॉ. जितेन्द्र फलोदिया रे साथे नर्सिंग प्रभारी रमजान तंवर रे खिलाफ एक्शन लियो। तीनां ने सरदार पटेल मेडिकल कॉलेज बीकानेर रा प्रधानाचार्य कारण बताओ नोटिस दियो है। उठीने कोटा जिला रा सुकेत मांय सी.एच.सी. मांय दो नवजात री मौत रा मामलां मांय दस कार्मिकां ने 16-सीसीए अर 2 डॉक्टरां ने 17 सीसीए रा नोटिस दीरीज्या है। चिकित्सा अर स्वास्थ्य महकमां री अतिरिक्त मुख्य सचिव बतायो है के बी.सी.एम.ओ. कानी ऊं तीन सदस्यां वाळी कमेटी ऊं नवजातां री मौत रा कारण री जांच करायी ज्यी ही। कमेटी आप री रपट मांय दोन्यू नवजात री मौत लू-तापघात ऊं व्हेणो नी मान्यो है फेरू ई कमेटी मान्यो के सीएचसी मांय

चिकित्सा कार्मियां कानी ऊं न्यारा—न्यारा थर माथे घणा बगत ऊं लापरवाही बरती जाय री है। इण रे चालता चिकित्सा महकमां कानी ऊं एक साथ केई कार्मिकां रे खिलाफ कार्यवाही करी जावे। वणा कहयो के लोगां ने स्वास्थ्य सेवावां मुहैया करावण मांय किणी थर माथे कोताही बर्दाश्त नी करी जायेला। जनस्वास्थ्य निदेशक डॉ. रवि प्रकाश माथुर बतायो के खुद गैर हाजिर महिला स्वास्थ्य कार्यकर्ता चंद्रावती शर्मा ने तुरत सस्पेण्ड कर दीरीज्या है अर बीसीएमओ डॉ. रईस खान ने सुपरवाईजरी लापरवाही अर राज्य सरकार रा हुकम री खिलाफवर्जी माथे एपीओ करी ज्या है।

000

चिकित्सा अर स्वास्थ्य महकमो प्रदेश मांय तम्बाकू सेवन रा कुअसर रा बारा मांय जाग जगावण सारू तम्बाकू निषेध दिवस 31 मई ऊं अंतर्राष्ट्रीय योग दिवस 21 जून तांई खास अभियान चलावेला। ई अभियान रा तैत प्रदेशभर मांय तम्बाकू निषेध थीम माथे रोज न्यारा—न्यारा कार्यक्रम व्हेला। जिला प्रशासन अर दूजा सहयोगी महकमां रा तालमेल रे साथै तम्बाकू निषेध गतिविधियां चलायी जायेला। ई साल विश्व स्वास्थ्य संगठन—डब्ल्यू.एच.ओ. कानी ऊं तैय विश्व तम्बाकू निषेध दिवस री थीम रे तैत टाबरां अर नौजवानां ने तम्बाकू सेवन ऊं बचावण सारू खास जतन कर्या जायेला। चिकित्सा महकमां री अतिरिक्त मुख्य सचिव बतायो के ई अभियान रे दौरान लोगां मांय तम्बाकू काम मांय नी लेवण अर इण रा कुप्रभाव रा बारा मांय जाग विकसित करण सारू मैराथन, साइकिल रैली, अर प्रभात फेरी जस्यां कार्यक्रम व्हेला। केन्द्र सरकार रा ऑन लाइन प्लेटफार्म माथे ई शपथ दिरायी जायेला।

000

शिक्षा महकमो आज 5वीं अर 8वीं क्लास रा नतीजा ऐलाण कर दिया है। जयपुर रा शिक्षा संकुल मांय शिक्षा सचिव कृष्ण कुणाल नतीजा काड्या। फौरु ई तकनीकी कारणां ऊं घणी देर तांई वेबसाइट माथे अपलोड नी व्हे सक्यां। कक्षा 5 मांय 14 लाख 35 हजार 6 सौ 96 पढेसर भेळा व्ह्या हा। इण मांय ऊं 13 लाख 93 हजार 4 सौ 23

परीक्षा देवणीयां पास व्हे ग्या। कुल परीक्षा रो नतीजो 97.06 फीसदी रह्यो। सरकारी स्कूलां रा नतीजा 96 दशमलव 79 फीसदी रह्या है। वठे ई निजूं स्कूला रा नतीजा 97 दशमलव 40 फीसदी रह्या। 5वीं मांय छात्रावां रा नतीजा 97 दशमलव 23 फीसदी, जदके छात्रां रो नतीजो 96 दशमलव 89 फीसदी रह्यो। आ परीक्षा 33 ज़िला रा आधार माथे करायी ज्यी ही। इण मांय दौसा, सीकर, अजमेर, प्रतापगढ अर चुरु रा स्कूलां रा नतीजा सब ऊं चौखा रह्या। कुल 9 हजार 5 सौ 38 परीक्षा देवणियां रा नतीजा न्यारा-न्यारा कारणां ऊं रोक दीरीज्या है। अ नतीजा बाद में ऐलाण व्हला।

000

विश्व पर्यावरण दिवस रे मौके जयपुर मांय 3 जून ने महिला साइक्लोथॉन राख्यी जायेला। 10 किलोमीटर लांबी आं साइक्लोथॉन संवारा साढे 05:00 बज्या सरु व्हेला। ई आयोजन रो खास मकसद पर्यावरण संरक्षण अर स्वास्थ्य रे प्रति जागरूकता बधावणो है। इंटरनेशनल सोसायटी फॉर लाइफ साइंस अर राजस्थान राज्य प्रदूषण नियंत्रण मण्डल कानी ऊं भेळां होवण वाळां ई आयोजन मांय बत्ती ऊं बत्ती महिलावां ने हिस्सो लेवण सारु बधावो दियो जावे।

000